

# Laax – giuven – cun slontsch romontsch

En vesta alla decisiun dalla proxima radunonza communal

■ **Il 7 da december decida la radunonza da vischnaunca da Laax davart l'iniziativa che less puspei introducir en scola il sursilvan enstagl dil rumantsch grischun sco lungatg d'alfabetisaziun.** Nus, ina gruppa da giuvnas e giuvens da Laax, essan peschua di che ton igl idiom sco era il lungatg da scartira unificau san viver fetg bein in cun l'auter.

Il romontsch schai a cor als da Laax. Buc il davos ei quei era vegniu francau ella lescha da vischnaunca ed el maletg empalont ch'ei vegnius elaboraus ed approbaus dalla populaziun ils onns 2004/2005. En quei muossavia ei p. ex. era vegniu decidiu che nosssa vischnaunca duess surpender ina rolla da piunier arisguard il rumantsch grischun. E quei ei lu era succediu, buc il davos entras introducir il rumantsch grischun sco lungatg d'alfabetisaziun en scola. Nus lein ch'il romontsch – il lungatg e la cultura – seigi dapli che mo folclora: Dapli che «Stai si defenda» e dapli che «Chara lingua da la mamma». Era quella cultura lein nus mantener, denton drova ei uss il slontsch necessari per far il pass el mund modern. Lein dar ina schanza al rumantsch grischun che porscha a nus tuts – e particularmein a nosssa giuventetgna – la pusseivladad da far quei pass. Sursilvan ei nies lungatg dil cor che nus discurren en famiglia e sin via, che nus duvrein per cantar e per far teater. Rumantsch grischun ei il lungatg dil paun che nus emprendein en scola, che arva portas pil



**Malgrad il rasant svilup turistic ei la vischnaunca da Laax restada ina vischnaunca romontscha.** LO

studi, per la professiun e che dat alla Romontschia la pusseivladad da seprentar sur ils cunfins linguistics sco ina unitad. Nus essan giuvens e cun slontsch lein nus s'engaschar che Laax resti era el futur ina vischnaunca ch'ei loscha da sias tradiziuns, che sustegn ideas innovativas e che drezza l'egliada en emprema lingua viers il futur e buca mo viers il vargau.

Il rumantsch grischun ei ina gronda schanza e perquei lein nus che nos scolars hagian vinavon la pusseivladad d'emprander quel – era perquei ch'ils mieds d'instrucziun ed agids linguistics sco p. ex. il program da correctura ni il pledari online ein instruments ch'ins savess mai e pli mai metter a disposiziun en quella qualitat en tut ils idioms. Perquei schein nus cun perschuasium: Gie al rumantsch grischun – Na alla iniziativa che vul bandischar quel dalla scola.

*Per il comite «Pro rumantsch Laax»:*

*Giacun Coray*